

光緒吉林通志

吉林通志卷一百七

人物志三十六

國朝二十一

薩克丹布

倭楞泰

安楚拉

金保

圖明阿

春升保

永海

德海

烏爾德善

阿勒罕保

額勒登額

穆克登保

和福

巴清德

圖欽

那桑阿

伊勒通阿

吉勒通阿

壽昌

烏凌額

德成額

託雲保

富春

托雲

薩克丹布姓鈕祜祿氏以吉林新滿洲隸正白旗乾隆四十九年隨尙書福康安征石峯堡逆回隸領侍衛內大臣海蘭察賊據底店山梁槍斃執旗賊目於馬上餘遂驚潰擢藍翎侍衛五十二年海蘭察以參贊大臣討臺灣林爽文仍從往賊據八卦山伏賊百餘山下竹園中我前行僅二十人賊遽出截馳斬一賊於是爭乘之多所俘馘進攻中林斗六門並克

賜號伯奇圖巴圖魯事平擢侍衛圖形

紫光閣

命詞臣爲之贊曰率眾攻堅奮擒驍悍毀柵截途殺賊無算
火燄騰山力窮鼠竄潰彼蟻封資爾勇幹嘉慶元年隨護
軍統領德楞泰征湖南逆苗石柳鄧奪全壁嶺克廖
貢坡馬鞍山並有功遷二等侍衛魚坡之麓名石隆
柳鄧所巢寨落甚夥隨都統額勒登保乘夜深入賊
眾以死禦卒不支陳斬柳鄧苗疆平遷頭等侍衛明
年移征川陝楚三省教匪隨額勒登保擊賊蜈蚣山
敗之進殲芭葉山賊屢戰紅土溪山嶺石柱嶺打子
臺天花坪雞公嶺銅鼓包並捷斬獲甚夥而大金坪

松林懷抱窩山梁之戰陳擒賊林士偉等數十人斬
百餘級尋追擊賊自爛泥渡窰圍子嶺及蓼葉村者
殲賊五百有奇四年以病乞休十年

詔薩克丹布前在軍多立戰功茲聞病勢益增賞給副都統
銜冀樂聞朕旨速愈其疾尋卒

賜祭葬如故事子格布舍累官甘肅甯夏將軍

倭楞泰姓赫舍里氏吉林人隸滿洲鑲藍旗嘉慶二
年川陝楚三省教匪不靖隨副都統賽沖阿勦川匪
明年授軍營委筆帖式四年藍號蕭占國張長庚等
自閩中回趨營山大軍逆擊於黃土牆斬級四百餘

賊竄據譚家山先眾登山梁短兵接陳斬占國長庚
殲賊八百獲賊目王家光等八百餘人白號冷天祿
屯悅來場我軍乘勝自閒道冒雨襲攻之逐北至石
頭堰蹙天祿俘馘甚夥

賞藍翎尋隨參贊大臣額勒登保擊青號徐天德於修基壩
賊竄鄧家山我軍三路圍剿多所斬獲六年襄陽賊
首任懷志就擒累擢佐領二十一年遷協領道光三
年任德州城守尉尋擢吉林副都統

賞換花翎明年疏陳優務將熟悉採獲創夫照舊規留山過
冬令尋覓培養供官獲之額其挑賸者卽賞給創夫

以資鼓勵五年疏陳雙城堡距阿勒楚喀百有十里
距多歡九十里文移既增兵丁疲於步送請增設一
站其牛馬草豆銀兩酌於南北三十八站內融支

詔並如議其冬以建造移駐京旗房屋劾佐領訥音登阿砍
木遲延因條上砍木章程以示懲勸從之六年疏請
撥甯古塔防禦四員於拉林並卽拉林領催以下挑
選關防辦事無品級筆帖式二員

詔如所請尋坐失察所屬報卡外流民戶口不實罰俸一年
秋逆回張格爾滋擾

命爲領隊大臣率兵會剿明年春戰洋阿爾巴特旣捷進攻

沙布都爾莊逐北數十里越日會攻阿瓦巴特回莊
賊阻岡爲陳大軍分兩翼進賊佯退復前卒力擊敗
之陳獲二千有奇斬級二萬殪賊目阿瓦子邁瑪底
那爾巴特阿渾二人乘勝攻喀什噶爾復其城張格
爾先遁斬賊目託和卓等十餘人八年凱旋回任明
年疏言雙城堡移駐京旗地畝較少請於原定移駐
京旗三千戶改爲千戶以所餘二千戶地畝增給之
每戶地可十五晌至本地旗丁三千戶授田亦少每
戶酌增地八晌三畝五分

詔如議尋疏吉林蓐務疲憊請將減票歸公之票並出山票

內短放之票自道光八年始暫免抽收銀兩以蘇丁力

俞之十五年坐爲佐領博卿阿訃受變賣戩頭獲價銀四百兩褫戍伊犁二十年用額魯特愛曼所屬界內塔錫圖畢開墾地畝功竣在事有力

賜塚尋卒子二貴昌協領貴明銀庫主事

安楚拉姓庫雅拉彥札氏吉林人隸滿洲正黃旗嘉慶二年隨副都統養沖阿勦教匪於四川四年擊賊黃土牆追之譚家山陳斬藍號蕭占國張長庚事具倭楊泰傳尋乘勝冒雨自間道擊白號冷天祿於悅

來場逐北至廣安州之城頭堰殪天祿俘敵甚眾

賞藍翎其夏隨參贊大臣額勒登保攻白號張子聰於雲陽縣之蒲家山克之子聰復糾賊目蕭焜與黃號樊人傑翼建等合大軍連敗之寒水壩楊家山譚家壩多所斬獲並有功而身亦被石傷累擢佐領十八年隨副都統色爾袞勦李文成於滑縣大軍既合圍文成竄輝縣司寨據焉以圖牽綴復分兵圍之文成窮蹙遂死餘賊悉就殲擒以功

賞換花翎尋遷協領道光六年隨揚威將軍長齡討逆回張格爾戰阿瓦巴特回莊進復喀什噶爾城事具倭楊

秦傳

賞副都統銜尋授甯夏副都統未幾以傷病乞休

詔食全俸終其身十年卒

金保姓庚克勒氏吉林人隸滿洲鑲黃旗嘉慶二年
隨副都統賽沖阿征陝西教匪時藍號張漢潮走平
利之會家壩我軍於東北山後要之多所斬獲黃號
齊王氏姚之富竄川境追擊之黑虎廟箭殪賊目張
世虎賊眾狂奔繳子坪周家壩躡擊連敗之其冬齊
王氏之富竄據陝境羅村壩官軍分路進擊金保身
先陷陳因大捷餘賊走黃官嶺將渡漢江大軍仍分

路夾擊殲賊踰千

賞藍翎明年駐營川陝邊界禦賊數有斬獲四年藍號蕭占
國張長庚自閩州折擾營山逆擊於黃土牆譚家山
陳斬占國長庚殲賊六千乘勝攻白號冷天祿於岳
池天祿敗走廣安州追及之俘斬無算殪天祿

賜號伊勒達穆巴圖魯六年白號高三馬五竄陝之鐵鎖關
擊獲之明年白號苟文明自平安寨折竄秦嶺追敗
之福安寨斬僞先鋒苟文清俘賊百數十文明竄龔
家灣躡獲逆屬秋文明就擒花石崖累擢二等侍衛
尋剿餘匪於鼈鍋子山殪賊目張芳吳廷召等八年

凱旋尋授前鋒參領十八年隨直隸總督溫承惠討滑縣教匪自輝縣進攻道口賊方造橋西渡擊之毀其橋大破賊眾冬抵滑縣擊敗桃源援賊掘地道實以火藥藥發城裂拔之加副都統銜陝之南山木廠停工役者乏食遂倡亂隨提督楊遇春剿之敗賊三元壩斬級百餘賊竄黃官嶺將入川率騎兵要擊遂北至階州俘斬千四百有奇二十一年授伊犁領隊大臣二十五年

詔選授鑲黃旗漢軍副都統調鑲藍旗蒙古副都統道光二年署鑲白旗護軍統領明年以病乞休

詔食全俸終其身九年卒

圖明阿姓杭阿塔氏隸蒙古正黃旗世居吉林嘉慶二年隨副都統賽沖阿征陝西教匪時黃號王廷詔合藍號張漢潮竄平利之會家壩我軍襲之而先伏峽口以待賊驚入伏俘馘甚夥其冬自鐵鎖關躡賊至羅村壩擊敗之餘賊由二郎壩折竄漢中我軍躡而剿焉殲賊盈千明年擊賊洋縣王家山獲劉有才等二百餘人白號高均德竄川境躡擊之數有斬獲連克張家寨石橋河斬級二百以功累官防禦再遷至協領道光十一年擢西安副都統明年疏言西安

滿洲營出征回疆無著駝隻請照甘肅採買駝隻價銀每隻賠銀二十兩分二年於兵餉內扣還

詔分八年以示體卹十三年與將軍桓格合陳籌議買補倒斃馬匹章程略言西安滿洲兵月給餉銀並米折銀人三兩四錢又津貼草豆折價銀人約六七錢請每月人存銀三錢計一年各存銀三兩六錢以備隨時買補倒斃馬匹之需年終覈計自賠補馬價購買草豆外所餘仍分給各兵庶馬政兵力兩有裨益

詔如所議行明年卒子慶玉驍騎校

春升保姓努葉勒氏吉林人隸滿洲鑲黃旗嘉慶二

年隨副都統賽沖阿勦陝西教匪冬賊自黃官嶺偷渡漢江我軍馳擊斬級千餘餘賊潰竄躡之復多斬獲

賞藍翎明年夏白號高均德自鐵鎖關走川境大軍追擊數有俘馘賊奔渠縣大神山與藍號冉文儔合官軍三路攻克之秋青號徐天德白號羅其清結黃號樊人傑擾營山縣之插旗山鳳凰寺進擊破之獲張貴等二百餘人斬千餘級賊竄箕山官軍追敗之又敗之蓼家福斬級六百獲賊目郭彥榜等三十餘人五年戰江油新店子及達州土主河並捷明年躡白號高

二入陝擊之山陽縣乾溝賽沖阿箭中賊肩諸賊忿
持長矛競進春升保力禦卻之仍乘勝追擊獲賊目
翼如一偽元帥閻慎珍而身亦被創累擢防禦

賞換花翎再遷至協領兼公中佐領二十三年擢齊齊哈爾
副都統道光二年疏言齊齊哈爾水災請將嘉慶二
十五年被災借給接濟銀兩緩俟道光三年秋收後
起扣以紓丁力

俞之先是黑龍江將軍奕顛等疏請於齊齊哈爾八旗甲兵
內挑撥四百五十名歸火器營管轄

宣宗命詳察復奏疏言齊齊哈爾八旗額設甲兵二千一百

七十名春秋演放鳥槍於八旗挑撥操練事畢仍歸
各旗當差若遽歸火器營管轄遇他差務不免顧此
失彼謂宜仍遵成規認真訓練於騎射外聞習鳥槍
以資簡閱

宣宗是之八年坐前黑龍江將軍祿成派兵不公及以私馬
交站餵養變價近與同城未能據實奏劾降三級調
用九年卒子台費音圖佐領

永海姓瓜爾佳氏吉林人隸滿洲正紅旗嘉慶二年
川陝楚三省教匪未靖隨副都統賽冲阿赴勦會藍
號張漢潮竄平利縣境我軍旣連敗之又敗黃號齊

王氏姚之富於甯羌州明年破白號高均德於洋縣
及之富齊王氏竄死郟西並有功五年隨參贊大臣
德楞泰入蜀至梓潼縣馬蹄岡破藍號冉天元賊眾
獲天元並偽總兵鮮其順

賞藍翎七年追擊黃號樊人傑於竹山縣蹙之平口河腦人
傑墜水死

賞換花翎累遷伯都訥及阿勒楚喀防禦十年擢伊通赫爾
蘇佐領十八年河南教匪李文成倡亂陷滑縣隨副
都統德英阿率吉林兵禦之衛輝數戰皆捷文成旋
竄據輝縣之司寨大軍攻拔之而吉林兵先登文成

死

賜號幹勇巴圖魯尋備提督銜總兵楊芳追剿陝西南山以
木廠停工倡亂之匪於沔縣疾馳至剪子河扼其入
川之路與副都統達斯呼勒岱遊擊萬彪分步騎夾
擊斬級五百餘逐北至塘子口陳斬賊目吳某餘多
解散明年賊渠翼貴就擒遷拉林協領道光三年擢
伯都訥副都統坐前於拉林移用庫銀及所屬浮報
義倉工程罷子庚音阿勒楚喀佐領

德海姓富察氏阿勒楚喀人隸滿洲鑲黃旗嘉慶四
年調赴四川隨經略大臣額勒登保剿教匪以滅藍

號張漢潮功

賞藍翎尋授防禦十八年河南教匪李文成陷滑縣官軍圍之文成竄據輝縣之司寨隨總兵楊芳攻拔之文成死功多

賜號藝勇巴圖魯從克滑縣旋調赴陝西剿南山餘匪事平累擢三姓協領道光四年調雙城堡協領坐前於三姓增給兵丁鹽菜銀兩革職留任尋擢阿勒楚喀副都統明年調黑龍江副都統六年逆回張格爾倡亂命與參贊大臣武隆阿統滿兵往會大軍協剿師至阿爾巴特莊賊憑沙岡以拒官軍分三路而德海與武隆阿

攻其右大敗之斬級盈萬獲三千有奇他軍實無算
師進沙布都爾莊賊眾十餘萬臨渠而陳冒險持短
兵越渠搏戰且戰且進進逼渾水河賊梟水遁逐北
三十餘里俘馘無算乘勝進喀什噶爾張格爾先遁
以所部克漢城據北面與諸軍圍攻復其城十年以
病乞休道卒於莫爾根城功未及敘也子富森協領
烏爾德善姓甯古塔氏吉林人隸滿洲鑲藍旗嘉慶
初隨征川陝楚三省教匪戰比有功

賜銀幣十一年隨參贊大臣德楞泰戰山西以功累擢阿勒
楚喀防禦調三姓二十一年擢吉林正藍旗佐領調

三姓鑲黃旗二十三年

駕幸盛京較射中靶被

賜道光六年隨揚威將軍長齡討逆回張格爾復喀什噶爾
城有功

賜銀幣明年遷本旗協領尋調三姓十八年擢甯古塔副都
統坐吉林將軍祥康攤扣官兵俸餉資駐京人員未
嘗阻止鑄四級調用

詔革職留任二十二年

駕幸木蘭以演園中靶者四

賜銀幣復於巴彥西諾園場射鹿獲之

賞戴花翎二十七年致仕

詔食全俸終其身咸豐三年卒子二色綳額驍騎校罕章阿

侍衛

阿勒罕保姓鈕祜祿氏吉林人隸滿洲正白旗嘉慶二年隨副都統賽沖阿征川陝楚三省教匪戰竹葉關克露風坪禦賊五郎廟並有功明年擊賊黃壩驛進攻東家坪又敗賊三岔河尋自秦嶺繞出華州邀賊賊大潰克華陽壩進大神山遇賊敗之賊竄風銅鋪躡擊殆盡以功

賞藍翎累擢侍衛十八年直隸長垣教匪擾及豫東

命直隸總督溫承惠爲欽差大臣勦之疏請阿勒罕保隨往
尋以逆匪擅入

禁城

命暫留京師協捕事平遷二等侍衛赴軍旣至新寨率精銳
直搗賊巢多所斬獲冬進攻道口賊出拒而桃源援
賊復至分兵擊之並潰擢頭等侍衛在

乾清門行走進攻滑縣會諸軍拔之獲賊目徐安國俘
斬萬數事平加副都統銜坐回京携帶幼孩鑄四級
調用

詔改留任仍在乾清門行走二十年授鑲藍旗蒙古副都統

明年

駕幸圓明園途有逸馬驚出

御前侍衛職在扈

蹕未卽前截坐褫職

詔降頭等侍衛在大門上行走俄復在

乾清門行走加副都統銜充伊犁領隊大臣二十五年

授正藍旗蒙古副都統道光二年充十五善射六年

逆回張格爾倡亂以領隊大臣率黑龍江官兵赴軍

剿之明年遇賊洋阿爾巴特官軍分三路擊之殲賊

幾盡大軍戰沙布都爾莊以騎兵張兩翼涉渠抄擊

賊驚潰陳斬賊目色提巴爾弟俘馘無算戰阿瓦巴
特回莊賊憑沙岡以拒又以騎兵由岡右襲之賊敗
斬賊目二殲賊三萬

賜號壯勇巴圖魯喀什噶爾城旣復張格爾先遁而賊目愛
瑪爾阿里玉努斯等猶據和闐揚威將軍長齡檄往
勦之取道雜古牙爾遇賊昆拉滿分兵夾擊大敗之
和闐平復授伊犁領隊大臣長齡疏留冬偵知張格
爾奔喀爾鐵蓋山率軍自阿爾圖什躡之賊棄馬登
山大軍窮追弗舍獲之山巔明年春齎捷奏馳報

京師

命在御前行走授正黃旗護軍統領圖形

紫光閣

御製贊曰索倫勁旅特命將之驍捷前鋒四城星馳火槍善戰躡蹤窮追超出賊背國之熊羆九年調鑲藍旗滿洲副都統以較射失儀革

御前侍衛仍在

乾清門行走秋扈

幸盛京坐有馬闌入布城鑄一級留任明年較射
宣宗臨閱中六矢仍

命在御前行走秋安集延回匪不靖隨大學士長齡赴新疆

察辦十一年回京坐失察馬甲呢莽阿教習鑄三級
留任十四年以年老退出

御前侍衛尋乞休未幾卒子崇連護軍藍翎長而前阿勒罕
保有額勒登額亦吉林人姓舒穆魯氏隸滿洲正黃
旗乾隆二十三年以侍衛隨副將軍富德援將軍兆
惠於葉爾羌敗霍集占功最霍集占竄拔達克山索
之其汗素勒坦沙因函首以獻

賜號時畢雅圖巴圖魯存擢頭等侍衛鑲黃旗蒙古副都統
授騎都尉世職兼一雲騎尉圖形

紫光閣

御製贊曰軍門統事諸務勤宣亦能力戰突將無前入拔達
山索逆回馘曉諭諸方是其偉績三十二年以參贊大臣
偕將軍明瑞征緬甸分道進明瑞殉木果木坐逼留
見法

穆克登保姓富察氏吉林人隸滿洲正白旗父靈泰
烏魯木齊領隊大臣嘉慶十一年

駕幸木蘭穆克登保從會陝西甯陝鎮新兵叛

欽差大臣德楞泰疏請簡隨圍弁兵赴陝西備調遣因隨護
軍統領溫春進至好古堆我軍分三路環賊攻之賊
敗躡以進又賊三千餘來戰勢頗張力擊之賊目蒲

大芳中創遁逐北至拐里賊分屯四山官軍扼方柴
關擒偽先鋒彭貴賊益氣奪因招之大芳降縛獻陳
達順陳先倫向貴三首逆磔軍前以功授親軍藍翎
長道光五年累擢護軍參領十年逆回博巴克糾浩
罕入卡圍喀什噶爾英吉沙爾城大學士長齡以

欽差大臣視師穆克登保隨往旣蕆事以功擢司鑰長尋以
副將揀發湖南補常德城守協副將十七年擢廣東
南韶連鎮總兵調陝西西甯鎮總兵二十年卒

和福姓庫雅拉亨奇勒氏吉林人隸滿洲正白旗嘉
慶十三年從

幸木蘭行秋獮射生多所獲

賞戴花翎十六年累擢協領又二年河南教匪陷滑縣偕副都統德英阿赴軍協剿時賊首李文成自滑縣竄據輝縣司寨官軍設伏白土岡山坳誘與戰賊恃眾直前既入伏大軍夾擊斬馘甚眾賊敗歸寨不復出進圍之舉火且焚且攻殪賊目劉國明文成死凱旋加副都統銜二十一年擢

盛京副都統明年與將軍富俊疏言復州等處被災旗民應領續賑米石各倉缺額不敷支放請以銀米兼放

命之二十三年疏言大凌河馬廠試墾地畝磽薄居多若照旗租之例升科勢必拮据請照養息牧試墾地畝例每畝徵租銀四分以紓丁力如所請行秋

駕幸盛京坐馬關橋瓦子峪

蹕路未能督率修整降金州城守尉尋又坐副都統任內通判常山丁憂未令回旗仍奏署

興京通判鑄三級調用富俊疏留

詔改調用爲留任未幾遷協領擢伯都訥副都統尋調甯古塔副都統道光十年疏言舊務請將減票歸公之票照吉林例九年爲始暫免抽收銀兩蘇劬夫之力如

所請行明年調甯夏副都統十二年調熊岳副都統
其冬疏劾蓋州防守禦焦成及蓋平縣知縣張攀桂
等查辦夷船不力降黜有差而已亦坐失察呈吏議
明年以病乞休

允之十九年卒子四文恆防禦開明阿喀什噶爾辦事大臣
杜恆協翎多恆佐領孫四承惠佐領承湛筆帖式承
英襲雲騎尉承緒領催

巴清德姓額扎特氏吉林人隸滿洲正黃旗嘉慶十
八年隨副都統德英阿勦教匪李文成於河南時文
成陷滑縣復竄據輝縣司寨

欽差大臣那彥成檄德英阿率吉林騎兵自新鄉會攻既克
司寨文成死進克滑縣獲賊目牛亮臣巴清德並有
功

賞藍翎尋擢藍翎侍衛道光元年遷侍衛在

乾清門行走充十五善射四年造辦處玻璃庫災救之
甚力

賜物六年授公中佐領尋擢二等侍衛奉

命隨山東巡撫武隆阿勦匪臺灣事平復隨赴回疆明年逆
回張格爾旣殲於沙布都爾莊復糾眾十數萬據阿
瓦巴特回莊官軍分三路進與侍衛哈郎阿繞莊後

襲之賊大潰俘馘甚夥逐北至洋達瑪河濱河回莊
逆匪接期殆盡

賜號襄勇巴圖魯進復喀什噶爾城張格爾先遁獲其孥及
安集延賊目推立汗擢頭等侍衛圖形

紫光閣

御製贊曰親簡勇壯命赴軍營長軀赤面弓馬純精兼嫻火
器屢立功名御前特擢望汝干城十年回疆復擾

命偕侍衛舒凌阿赴軍事定留辦屯田十二年隨

欽差大臣瑚松額剿匪臺灣嘉義縣首逆尋就獲回京十五
年授鑲白旗蒙古副都統明年充國什哈諳達授鑲

藍旗護軍統領

圓明園災以力救加二級歷調鑲黃旗滿洲副都統正藍旗正白旗護軍統領管理健銳營神機營火器營事務二十一年英夷不靖海疆戒嚴

命借御前大臣科爾沁郡王僧格林沁工部尚書賽尙阿赴天津防堵明年夷擾江蘇復

命率蒙古騎兵駐新城秋還京坐火藥局災失察被議二十四年署右翼前鋒統領明年坐兩翼兵槍箭生疎錮二級留任夏

紫禁城災救甚力加一級二十六年卽眞尋轉左翼前

鋒統領三十年擢鑲黃旗蒙古都統署正藍旗滿洲
都統咸豐元年署行營正黃旗領侍衛內大臣粵匪
洪秀全等倡亂

命借

欽差大臣大學士賽尙阿馳往辦賊夏疏陳汰兵勇明紀律
購閒謀散賊黨斷接濟行團練各條得

旨所籌甚合機宜

賞穿黃馬褂時賊據紫荆山後負豬仔峽雙髻山之險而前
以新墟爲門戶秋與提督向榮由中路搗豬仔峽克
之進攻雙髻山率勁卒攀巖上賊不能禦遂潰逐北

三十餘里多所斬馘被

優賚大軍攻克風門坳隘口遂圍新墟而巴清德與向榮趨
古林社復緣河以進賊傾巢出戰擊之卻賊因分據
出梁仰攻之斬三十餘級殲賊目一賊自焚其巢由
藤縣和平墟逸去尋陷永安州

命摘去頂翎復以饗尙阿劾其頓兵遷延

詔褫職留營自效大軍攻永安與提督劉長清進自北路燬
龍眼潭馬背嶺賊巢俄卒於軍

詔復都統

賜銀三百兩治喪

賜祭葬

子諡果毅方疾已劇時時橫刀起大呼殺賊及革有茗盂覆以紙兩手牢握之笑曰我擒洪逆矣子二倭什洪額侍衛倭興額二品廕生粵逆起金田塞其涓涓一良吏事耳不肖者尸焉遂致滄海橫流竭天下力僅乃砥之而所戕生靈百千萬計矣人有恆言曰官逼民反夫民何樂而反官州縣暨有進退州縣權者其念哉而嘗與巴清德同隸

欽差大臣那彥成轉戰河南山西均有功者曰圖欽姓關氏亦吉林人隸滿洲正紅旗嘉慶二十三年以襲雲騎

尉世職歷防禦佐領道光九年擢琿春協領坐開公
倉放糧未俟部文奪俸咸豐三年擢三姓副都統九
年卒子四德祥佐領德海護軍校德昌協領德壽驍
騎校孫三善福前鋒校明安頭等侍衛明林侍衛
那桑阿姓鈕祜祿氏吉林人隸滿洲正白旗嘉慶二
十一年以藍翎侍衛在

大門上行走較射中五矢授侍衛二十五年擢二等侍
衛在

乾清門行走道光元年擢頭等侍衛六年逆回張格爾
犯順揚威將軍長齡檄調伊犁兵赴援於是伊犁領

隊大臣皆出

宣宗簡侍衛三人爲領隊大臣馳赴伊犁那桑阿與焉長齡
疏調從征明年戰洋阿爾巴特我軍分三路率健銳
火器二營兵爲右翼賊自沙岡下壓擊之殲賊數百
仍還據沙岡我軍冒鋒刃疾進賊大潰逐北三十餘
里復躡擊至排子巴特多所斬馘獲賊目五邁曼底
阿渾尤張格爾所親任藏有糾結賊黨書長齡上其
功被

優賚進復喀什噶爾城加副都統銜授英吉沙爾領隊大臣
賞戴花翎明年率步騎八千會長齡於阿爾圖什追剿張格

爾獲之喀爾鐵蓋山回疆平那桑阿以英吉沙爾地
衝要雖有參贊經理而專城之責在領隊大臣既不
識文字懼難勝任請

欽差大臣那彥成代陳改烏什幫辦大臣尋

詔還京

命仍在乾清門行走十二年授鑲黃旗蒙古副都統歷伊犁
及庫爾喀拉烏蘇領隊大臣復調伊犁十七年還京
二十二年從獵團河

賞穿黃馬褂其夏英夷擾江蘇

命工部尙書賽尙阿爲

欽差大臣督辦天津海防復以蒙古馬隊必得通曉語言者
爲之率

命那桑阿偕往言事許並列銜仍

賜衣二襲解嚴回京二十六年

詔年逾六旬但管旗務毋庸在乾清門行走明年病卒子雙
喜雲磨使公中佐領

伊勒通阿姓伊爾根覺羅氏吉林人隸滿洲鑲藍旗
嘉慶十八年從征河南教匪李文成有功任防禦三
十二年從

幸木蘭秋獮較射中矢多及行圍獲麇鹿

賜銀幣尋擢佐領道光四年擢阿勒楚喀協領六年隨揚威將軍長齡討逆回張格爾戰洋阿爾巴特我軍分三路參贊大臣楊遇春居左武隆阿居右伊勒通阿與副都統吉勒通阿隨長齡進中路而三路之軍仍各張兩翼破賊二萬餘逐北數十里至排子巴特再擊之斬級甚夥獲賊目邁曼底阿渾等

賜號沙罕巴圖魯進戰沙布都爾回莊仍分三路長齡等督步軍居中先嘗賊吉勒通阿以騎兵繼之而伊勒通阿與武隆阿分左右橫貫賊陳賊亂遂大潰躡逼至渾水河殲之殆盡遂由阿瓦巴特長驅喀什噶爾城

張格爾先遁城復獲其孥及安集延大酋推立汗薩木汗等

賞戴花翎其冬張格爾復糾布魯特賊眾自開齊山趨阿爾圖什回莊黑帽回遮截之乃退我軍追及於喀爾鐵蓋山偕吉勒通阿以騎兵繞登山後與諸軍夾擊獲焉加副都統銜圖形

紫光閣

御製贊曰踴躍用兵河南滑縣茲統三軍獨當一面出陳先驅披堅督戰卡外山前臨機應變播宵夏副都統護理將軍尋以回疆復擾隨長齡出關會事平回任明年調

甯古塔副都統十八年親老乞終養服闋起授正藍旗蒙古副都統改三姓副都統坐扣兵餉資住京官革職留任咸豐二年粵匪擾湖北率兵赴河南信陽州隨

欽差大臣琦善禦賊尋授江南戰比有功明年卒於軍

賜祭葬如故事蔭一子六品官子二花尙阿佐領祥玉藍翎侍衛以孫蔭哩哈承蔭吉勒通阿官副都統

賜號薩奇克起巴圖魯與剛安巴圖魯協領壽昌博啟巴圖魯佐領烏凌額蘇彰阿巴圖魯佐領德成額並吉林人以回疆功圖形

紫光閣事並未詳

託雲保姓額哲特氏吉林人隸滿洲正黃旗嘉慶十八年從征河南教匪以功授藍翎長道光七年回疆平隨

欽差大臣那彥成往辦善後事宜歷擢護軍參領充虎槍長及諳達三十年擢頭等侍衛在

乾清門行走充壓馬大臣授上駟院卿咸豐元年擢正紅旗漢軍副都統明年

文宗自

慕陵旋

蹕中途乘馬蹶坐平日騎歷不慎被吏議三年粵逆洪秀全等陷江南會城奉

命率吉林兵二千赴大軍剿之賊援河南往援道出延津縣所部攘民間牲畜傷人爲

欽差大臣直隸總督訥爾經額所劾銷三級調用仍留營秋賊渡河北攻懷慶府甚急我援軍營丹河鋪迤南季村以騎兵與會戰於城下焚環城賊壘多所斬馘賊竄濟源縣而設伏風門山口前軍追賊入伏督所部馳救槍殪賊目賊驚靡擒斬大半別賊闖入山西陷平陽府據之

欽差大臣都統勝保劾追截不力

命摘頂翎賊尋竄直隸據靜海縣及獨流鎮隨勝保自深州疾馳至獨流鎮連戰皆勝

賞還頂翎大軍營葡萄窪逼攻獨流鎮靜海賊來援分兵擊之斬級五百有奇賊勢益蹙會以病回旗四年秋病痊仍赴勝保軍冬授正藍旗蒙古副都統於是賊竄山東陷高唐州據之勝保移師圍攻數月未下明年春勝保以老軍被逮賊尋自高唐竄據馮官屯隨參贊大臣科爾沁親王僧格林沁破之俘賊渠李開芳

賞換花翎調正紅旗蒙古副都統還京

命在御前侍衛上行走授奉宸院卿冬擢甯夏將軍先是道光二十二年甯夏兵每歲添演秋圍將軍與副都統番率至賀蘭山肄馬上鳥槍及諸技著爲令西安甯夏官兵一律添演秋圍借副都統疏言甯夏駐防官行圍錢糧官借官僱兵借兵僱視綏遠城以卡倫房租作公項給發者不同見餉項不足兵力亦艱若復加行圍給項不特不能清償且累上加累請俟協餉充裕照例演習

詔如所請八年以病乞休

允之明年卒

富春姓韓氏隸蒙古鑲紅旗吉林駐防道光七年從
攻回疆喀什噶爾城先登

賞藍翎十四年洊擢協領二十一年擢黑龍江副都統時英
夷肆擾以所部防守錦州之高橋被

優賚二十四年傳習邪教海康之女於黑龍江配所潛逃坐
革職留任尋以非副都統所管轄

詔免議明年入

覲

賞換花翎二十六年以病請罷咸豐二年粵逆陷湖北武昌
命吉林將軍調兵往防楚豫之交時富春病痊請赴軍自效

詔如所請明年賊陷江南會城督兵於六合縣境禦賊數有
功授甯古塔副都統仍留軍六年賊陷揚州我軍進
攻有賊來自西北甚眾將襲我營偕總管西昌阿分
道禦之戰七里店既捷合軍躡擊至黃家莊獲賊目
五長髮賊六十有奇斬千餘級

賞頭品頂戴大軍復揚州以所部伏截竄賊殲斃無算

賜號伊伯德恩巴圖魯八年春江甯賊渡江援江浦合烏江
據賊營石積橋江浦賊千餘出應大軍擊援賊敗之
平其壘獨率所部禦城賊戰於濠邊斬百餘級和州
復烏江芝蔴河等賊將遁分路要擊俘馘及溺江以

斃者甚夥其夏皖賊下援江甯趨江浦利捻逆會大
劉莊與大軍分路攻之會大雨如注乘勢猛進賊不
支狂奔自相踐蹋死者甚眾秋戰江浦被創養傷邵
伯鎮

欽差大臣德興阿以

聞

詔富春劄不甚重輒自離營以年邁且著有勞績免予治罪
因罷職九年卒於家富春雖終斥要猶經戰陳非但
具官資如托雲也

托雲姓彥扎氏吉林人隸滿洲正黃旗道光二十六年

年以藍翎侍衛在

乾清門行走從

謁

東陵授侍衛

賞穿黃馬褂咸豐三年游擢頭等侍衛四年

文宗閱馬射中六矢

命在御前侍衛上行走授正藍旗蒙古副都統八年署正白

旗護軍統領尋

命進

圓明園班管理

御槍處事務署鑲藍旗護軍統領

文宗閱八旗槍操以平日悉心訓練被

獎卽真歷署鑲藍旗漢軍鑲紅旗滿洲及漢軍各副都統同
治元年授正藍旗護軍統領三年調正白旗

命兼管火器營事務明年擢右翼前鋒統領調正紅旗滿洲
副都統丁母憂尋以神機營操務有勞被

獎十年歷充左翼監督授鑾儀衛鑾儀使署正白旗蒙古副
都統光緒元年神機營疏保出力

賞都統銜歷署正紅旗正藍旗滿洲副都統授左翼前鋒
統領

命紫禁城騎馬擢正紅旗蒙古都統坐薦舉營總文忠護
軍校國春卓異御史鄧慶麟言文忠貪婪狀得實應
鑄二級調用

詔改降四級留任明年以病乞休尋卒

賜祭葬如例子阿克占工部郎中

吉林通志卷一百八

人物志三十七 國朝二十二

關保

安圖

貴陞

德英

伊興額

金順

花哩雅春

德昌

德玉

關保姓烏扎拉氏吉林人隸滿洲正黃旗道光六年及十年再從征回疆有功二十三年歷擢三姓佐領咸豐三年隨侍郎恩華勦粵逆戰河南懷慶府山西

平陽府並捷還屯保定

欽差大臣勝保檄充營總率所部勦深州靜海餘賊還攻獨
流鎮功多擢協領

賞戴花翎明年隨參贊大臣科爾沁郡王僧格林沁自獨流
鎮躡賊至阜城三里莊賊首林鳳翔反戰額中槍丸
裹創進賊不支逐北四十餘里

賜號年昌阿巴圖魯五年調赴安徽會大軍克廬州加二品銜
明年隨江南提督和春勦五河踞賊以所部分伏道
左賊出夾擊之賊驚竄多所斬賊尋偕副都統麟端
以騎兵薄賊壘賊三千餘繞襲我後先諸軍馳陷其

陳賊卻黃衣賊目三橫刀立馬陳後復麾之進所部
槍殪其二賊乃大潰俘斬千餘夏隨僧格林沁蹙賊
山東高唐州之馮官屯殲焉已調湖北尋調河南又
調安徽當是時吉林馬隊名天下東南水陸軍恃以
相輔故諸帥銳欲得之故事功上克城騎所長野戰
故以十日閒奔命三省勞則甚矣關保蓋猶之偏裨
既赴和春軍道敗邳州援賊解壽州圍毀賊壘二尋
擊賊潁上縣高橋及八里河十八里鋪小青龍尾小
河沿五戰皆勝秋移隸河南巡撫英桂敗賊馬村橋
進亳州雙溝遇賊姬橋殲之又連敗賊三丈口舊縣

集安徽巡撫福濟疏請赴蒙城英桂疏請留豫

詔兩撫和衷商推俾先所急時方率軍趨懷遠聞捻逆逼徐州越境助擊勝焉漕運總督邵燦又疏請暫留徐州詔如所請七年偕總兵史榮椿馳永城岳家集掩取捻逆李月月先遁焚其巢尋以病歸明年天津警

詔起之冬

命率吉林黑龍江察哈爾兵千八百赴太僕寺卿袁甲三徐州軍九年春與宿濰兩營騎兵分路攻滄北捻逆曹金斗金斗據圩死守圍而臨以火器賊眾亂破之乘勝疾攻捻逆張寶全復破之而懷遠逆首張樂行以

步騎萬餘陷泗州踞草溝民寨北築一圩爲犄角合
民圍進奪圩外礮臺燬其圩寨賊出不意大驚則開
東南門分竄自相踐蹋死濠間纍纍其逸出者躡擊
之尸積數十里沱水爲不流至五河雙渡口餘賊方
奪船爭渡我騎然槍排擊復殪大半斬馘外獲長髮
賊渠張起等三百有奇及軍實甚夥

詔以副都統記名時徐州鎮總兵傅振邦督辦三省勦匪事
宜

命爲幫辦攻逆首任乾於畢圩未至適擒逆張天福敗覺滄
水擊斬之師進任乾突走不得反入圩乘勢壓攻圩

民內應斬乾殲其黨千餘無脫者夏

文宗罷副都統伊精阿河南防軍

命接統之督辦河南勦匪事宜仍爲傅振邦幫辦尋投黑龍
江副都統秋捻逆犯亳州遣將敗之時逆首孫葵心
聚黨於永城分起齊出

詔江蘇豐碭等處賊勢將蔓延未可更令闖入山東邊境宜
督參將承惠等截賊西路逼之歸巢旣而葵心分擾商邱
柘城圍睢州且至杞縣開封戒嚴

詔赴援俄承惠挫於亳州賊趨蘭儀分擾通許尉氏益近會
城急自鹿邑馳抵陳留令諸軍夾擊偕巡撫瑛榮疏

聞

詔賁徒事尾追著著落後未幾賊南走許州告警馳援之而賊由臨潁趨舞陽復分緣郟城之洪河而西期於舞陽復合令副將王鳳翔率騎兵馳扼洪河自以步軍繼進鳳翔擊賊洪河北岸敗之明日賊攻臨潁督諸軍戰城下有劇賊擗蠶自其陳呼嘯出賊眾從之勢張甚我軍殊死戰陳擒擗蠶者葵心親屬孫套也賊氣奪遂潰逐之並敗其踵至者夜遊精騎劫賊營又大破之拔難民千餘斬馘無算賊遂東奔偵別賊窟扶溝太康要之王隆集復敗而奔於是南路餘擒遏

巢北路亦三戰三捷河南肅清明年

命勝保督辦河南勦匪事宜關保仍爲幫辦賊擾虞城夏邑
鹿邑遣將擊走之賊俄又大至逼近會城

詔詰關保駐鹿邑何以未截擊致賊深入令勝保據實以聞
勝保疏陳河南鄰賊之處表延千里無險可扼加兵
力單薄防務視他省尤難此次賊近開封關保方歷
周家口至項城汝陽扼勦東路聞警卽由睢赴援忠
誠勇敢眾所共知復言其敗捻逆蔡溝追至槐店斗
門斃賊數千狀

詔獎之尋戰汝甯確山魏橋皆勝秋賊窺鹿邑旣設守仍遣

將破之劉集並解邱集之圍賊尋復糾眾來攻遣將
閒道出賊後與城中軍合擊賊大敗遁於是河南再
肅清尋以舊傷發

給假調理同治元年之任黑龍江八年卒

安圖姓伊爾根覺羅氏吉林人隸滿洲鑲紅旗咸豐
四年從征山東臨清州粵逆有功

賞藍翎移師湖北克漢陽八年賊自皖陷麻城黃安二縣隨
大軍攻復之又越境敗賊

賞換花翎歷擢防禦十一年克孝感擊賊德安復勝

賜號圖蘇克特伊巴圖魯擢甯古塔佐領冬攻下德安府城

以協領卽補加副都統銜同治元年移師河南粵逆
馬融時擁眾圍南陽勢張甚借道員金國琛擊之白
河塵戰三時許斬馘甚多圍立解

詔以副都統記名安圖生平戰功是役爲最著國琛故楚軍
名將數當劇賊會與之借故功成不旋踵云明年秋
亳州捻逆由河南闖入湖北鍾祥縣境並分趨京山
之宋河復東擾應山通縣城借總兵梁洪勝截擊數
敗之殲賊無算

詔加都統銜調吉林佐領三年授拉林協領明年擢金州副

都統

命之任十年雨傷稼鄉民以災報延不飭查致聚眾闕於署
事寢上

聞

詔盛京將軍都興阿等察辦十一年都興阿等以實覆奏下
部議罷之尋卒

貴陞姓伊爾根覺羅氏吉林人隸滿洲正藍旗咸豐
三年從征粵逆明年至江南攻九洑州賊壘有功

賞藍翎六年戰葛塘集冒險奪賊巢被創八年破全椒江浦
交界大莊等處賊壘十年援金壇遇賊丹陽力戰被
創明年歷擢三姓佐領同治元年擊卻江皖悍賊者

再

賞換花翎三年江北肅清用揚防積年禦賊功以協領卽補
充吉林頭起委營總江甯會城克復加副都統銜調
赴甘肅甯夏勦回逆明年駐定邊擊賊黃河兩岸連
敗之

賜號呼敦巴圖魯五年授烏拉協領尋復甯夏靈州城及數
攻破賊卡

詔以副都統記名八年秋賊以大衆逼河逆戰府谷縣十里
長灘大破之河防解嚴

賞頭品頂戴未幾赴甯夏圍攻王家疃賊巢殲於礮

賜祭葬如故事諡謹武子騎都尉世職

詔祀京師及原籍昭忠祠死事所在建專祠靈柩回旗官爲

護送云

德英字潤堂姓何圖哩氏隸蒙古正藍旗世居吉林
城北沙河父尤成額謹厚嗜讀書步趨宋儒爲左翼
官學教習垂五十年學生頌之不置事繼母孝妻關
有懿行亦知書德英其長子也咸豐二年以附學生
委筆帖式從征粵逆戰江皖之交有功

賞藍翎五年戰江浦縣七年戰淮安徐州府境甚力

賞換花翎歷擢佐領明年隨

欽差大臣勝保剿北路捻逆破賊圩十餘以協領卽補九年
以病乞回旗同治元年起授協領明年署阿勒楚喀
副都統奉天昌圖廳盜犯王五糾眾劫略闖入吉林
既擊走之餘賊據通溝岡率軍殄除殆盡加副都統
銜卽真四年入

覲

命署吉林將軍有頃奉天遼陽州賊起官兵失利賊北走
詔吉林嚴防又以吉林伏莽甚多

詔並爲備當是時吉林各軍悉調東南討賊疏請神機營留
演吉林騎兵百爲奉天所截留調回禦賊者再及請

徐州軍營所徹官兵馳回原省

詔並俟尙書文祥至奉天後商辦不得已乃練民團勸閩閩捐資餉之賊渠劉果發尋竄出圍場據一拉溪岔路河擾及旁近而王樂七馬傻子周榮暨各黨一時叢起山中諸匪尋聲響應之佐領保隆參領常德等先後戰沒於是伊通長春雙城五常伯都訥拉林阿勒楚喀無慮皆賊矣伊巴丹站道梗賊逼烏喇街去會城裁七十里會城故土垣德英擁市人以守莫不危之而其氣殊厲徒步雜士卒巡撤會劉果發周榮相繼斬獲疏調留演出征軍皆回援文祥及署黑龍江

將軍寶善並奉

詔遣軍與蒙古郭爾羅斯兵以次至聲威既壯兼部發餉銀
五萬兩士飽馬騰羣賊略就殄餘散走諸山中鬻子
由是萌枿焉鬻子吉林以稱盜厥後邊防宿重兵時
肆劫略不敢輒揭竿然有數十人連陷二城易剽而
撫者日益滋甚民不聊生乃懸之著令獲鬻子五與
彙保將領以下甘心焉有司鞠非實出之則譁爲賄
縱於是歲誅千數百訖不少衰其放卡之兵首鼠兩
端爲德於盜者閒有而吉林地瘠早寒穫少一夫所
受什古制猶贏中田而廬無守望之助故鬻子易逞

策之但去著令仿富俊屯墾其民

祥寯述本傳

資無籍者

部勒之使屯田邊界而已明年德英丁父憂百日孝滿回阿勒楚喀本任部議祿職治陷屬城罪

穆宗以籌兵籌餉卒保會城改革職留任六年調吉林副都統尋署黑龍江將軍明年春疏請緩呼蘭廳所屬巴彥蘇蘇等處被災租賦及齊齊哈爾城墨爾根城旗營屯站歉收請借給籽種口糧並

俞之八年夏

詔簡馬隊五百遊員率赴宵夏將軍穆圖善軍疏言治裝銀貸自商人應由部撥款以償

詔如所請秋卽真十年以黑龍江附近蒙古荒地例禁開墾
杜爾伯特協理台吉那遜烏爾吉等擅行招墾止之
不聽而副管托蒙阿等復以努毓河北克音河南之
荒地擅請撥放分別劾罷之十二年疏陳餉絀請

飭部咨會各省協餉依限解清並補解歷年積欠及吉林黑
龍江山場荒地招墾後或窩藏匪盜現已編查戶口
以絕其源呼蘭等處雖禁止開墾仍有奸民土豪承
攬地畝轉售漁利等弊請

飭部定章示懲又黑龍江新設理事同知所轄遼闊人雜事
繁銓選之員經年始至請以此缺歸奉天揀發人員

內遷補庶邊地收得人之益及奉天旗民近年徙吉
林黑龍江者多至千餘戶請

飭該將軍下所屬旗佐隨時稽察期有限制

詔並從之明年春卒

穆宗悼惜焉

賜祭葬如故事謚曰莊毅予其子忠清藍翎侍衛

伊興額字松坪姓何圖哩氏隸蒙古正白旗世居吉
林父德林保性勇敢以佐領從征臺灣四川戰輒冠
軍

賜號珠克圖巴圖魯

賞戴花翎伊興額少孤家貧躬耕牧冬入山樵採手足重繭
意豁如也道光十年從征喀什噶爾次肅州事平十
九年以人材挑選入都授侍衛擢入滿洲正白旗二
十一年英夷內犯出防浙江海口明年還京尋以病
假歸咸豐三年粵逆擾兩湖東南騷動請赴軍翼得
當以報於是隸

欽差大臣琦善於揚州明年賊來犯以騎兵擊之北門賊敗
去尋戰三汊河及浦口並勝旣而賊復犯揚州偕總
兵武慶擊敗之明年攻毀浦口賊營累擢頭等侍衛
五年江南大營以副將吉連扼對江石磧橋而水軍

泊三山與相犄角水軍俄沂江上陸路勢孤賊分兩路逼石磧橋眾號數萬時以偏師屯浦口語武慶曰吉軍破且及我當往救答曰專令可乎曰事已亟救鄰軍之危獲專令之譴請以身當於是偕總管西昌阿夜進黎明薄賊壘會天大霧礮矢齊發譟聲雷動賊大駭不知軍所從來且不辨多寡遂空壘以奔吉連亦出兵夾擊斬級三千餘乘勝復江浦西解和州圍所斬賊及自溺死者踰萬六年調勦捻逆時賊渠任仲勉據南屏築礮臺自固師進滄河北岸賊來戰騎兵張兩翼抄擊之槍無虛發賊敗自相踐踏死者

以二千計河水爲斷流躡擊至南岸斬仲勉餘賊悉
就殲尋破賊渠李大喜於宿州孫疇等集又擊敗白
任乾宿州城下解其圍多所斬敵逆首張樂行逼徐
州擾及永城縣偕徐州鎮總兵傅振邦禦之陳獲賊
渠孟繼民賊驚潰逐北十數里而宿州灘口爲安祿
賊眾所據復偕振邦分路攻之殪賊甚夥追擊過河
回窺永城據賊偕振邦戰兗家集大捷進平鐵佛寺
柳子集呂家橋諸賊巢賊擾潁上偕總兵郝光甲擊
敗之會河南官軍攻賊雒河集自潁上馳助斃賊七
百有餘羣賊尋復萃徐州圍郡城旁擾蕭陽豐等縣

偕振邦等并力戰守圍旋解

詔以副都統記名

黃戴花翎賊渠王廣愛梁振貴糾眾張家七樓號數萬議北
竄將擊之所部步軍二千騎什之一眾寡遠不侔因
於夜半先以騎銜枚疾馳毀壘垣直入獲廣愛振貴
賊黨驚擾既拚死命來救率騎然槍縱橫四突賊皆
辟易會步軍繼至賊益不支殲之殆盡授正紅旗蒙
古副都統傳此授在八年然
行狀云爾宜非謬明年賊渠李月自三河
尖北竄月劇賊善戰則堅壁持之爾知賊黨有陳保
元者頗能事母陰使人致之令誓招保元保元猶豫

則單騎往曉以大義保元以其眾五千降月大驚宵
遁追擒之大陳集軍與來號名將者大抵持士卒血
肉與礮火競短兵接者希矣矧用聞伊與額官侍衛
京師自以少失學喜從通人遊用稍稍知古兵法故
擲保元獲月平劇寇旬日閒雖然儒者亦多秉節鉞
豈兵書不之讀而覆敗相尋顧其能用否耳於是

賜號額圖渾巴圖魯以病回徐州療治爲

欽差大臣勝保所劾

詔摘頂翎仍責後效尋破賊渠梁思柱於鄆家墟劉大淵於
喬家廟獲思柱殪大淵復借總兵史榮椿破趙家屯

賊窟渦河南岸賊巢悉平

賞還頂翎八年攻賊宿州紀家莊敗之俄自臨淮躡賊至蒙城破其眾盈萬戰賊薛家湖斬三百餘級攻湖東西賊巢毆傷右骸裹創進卒破平之

賞頭品頂戴進勦宿州以南多所俘斬與逆首張樂行戰穎亳之墟自辰至午閱三時斬千餘級而賊渠劉天祥以數萬眾自六安北竄孤軍慮爲所乘退屯蕭縣將伺便擊之而豐縣陷於賊坐視職明年起原官時傅振邦督辦三省勦匪事宜

命爲幫辦接統太僕寺卿袁甲三所部而逆首劉天福圍我

滄北軍方亟外環賊營二十四令騎兵裹糧直陷重圍自內反攻向外外兵與夾擊賊潰梟滄河還圍立解

詔獎焉疏調翰林院編修李鴻章工部主事于凌辰赴軍詔如所請後鴻章身都將相功名盛一時其去近侍治軍始此知人之明與以人事

君之忠伊興額幾幾與駱秉章胡林翼曾國藩諸名臣爭烈矣尋

命督辦河南剿匪事宜躡賊至商水縣老湖坡令佐領穆克德布富亮分道進而自繞出賊後夾擊賊潰逐北至

太和縣孫家圩斃賊二萬有奇

詔獎焉又偕傅振邦破賊袁家集多所斬獲勝保劾商水之戰不救舞陽又所上首功不實

詔革去頭品頂戴旋褫職舞陽者去商水二百里有奇戰商水日總兵邱聯恩同日戰沒舞陽勝保所劾時論不以爲伎諛謂若當是役必能分其身半戰商水半救舞陽云十年病回京師都察院奏安徽監生張鴻文呈稱伊興額在軍士皆用令遠近悅服請加重柄仍總辦勦匪事宜毋令牽制必能迅掃賊氛報

聞秋京師戒嚴王大臣知謀勇兼資與策戰守會和議成科

爾沁親王僧格林沁請與南征

給六品頂戴道出濟甯紆鄒縣謁孟子廟呼諸將羅拜曰彼丈夫也我丈夫也數語每誦之輒自壯願共勉之進及僧格林沁徐宿聞其民焚香夾道迎拜僧格林沁謂迓己也好語謝之拜者不解所語但曰聞伊都統來吾輩不復憂賊故拜迎僧格林沁歎其得民心如此爲疏

聞

賞三品頂戴辦理徐宿民團事宜時以故將復起舊部曲多不隸麾下所將五百騎及增募者練未成軍而賊竄

曹單迤東近接畿輔奉急檄與徐州鎮總兵滕家勝
襄五日糧北援及賊汶上家勝爲前行鼓饑疲士赴
之賊眾圍我數匝家勝戰方酣馬蹶死家勝故所部
驍將累立戰功聞其被圍率百餘騎馳入索之不得
復潰圍出賊亦麇集然不敢近皆四遠聞之憤甚橫
刀縱馬突賊厚處亂斫所斬刈過當竟沒於陳百餘
騎悉殉時十一年春也夫捻逆蠡起原於粵逆東豫
江皖之交無慮皆是當其糾結而出或卓旗於門門
有籍籍與者之名期以時日婦人至市衣釧易馬壯
夫之行視若商販所過肆焚掠不攻堅不久頓爲官

軍所逼閒逞其鋒既展捆載歸處賢於力耕矣當時
章奏往往云逼使歸巢巢安在歸不復出乎蓋黠而
難制實甚粵逆彭毓橘劉銘傳並湘淮名將或覆或
亡僧格林沁亦殉疆場僧格林沁忠勇蓋世願其辨
賊相與馳逐無所謂謀謨不免如

文宗賁關保徒事尾追著著落後伊興額有儒將風且知用
閒獨數起數蹶當一面無幾時而其卒亦不能不致
於賊惜也事

聞

詔復原官

賜祭葬如典禮

予諡壯愍給其子盛福騎都尉世職而立功所在及吉林故

籍

許建專祠

金順字和甫姓伊爾根覺羅氏吉林人隸滿洲鑲藍旗少孤貧事繼母孝性忠懿樸勁踰冠從戎崎嶇三十餘年入死出生與軍事相終始非偶然也咸豐三年粵逆竄山東隨大軍禦之以功授驍騎校

賞藍翎六年隸副都統多隆阿敗賊湖北麻城蘄州尋破之

黃梅縣

賜號圖爾格齊巴圖魯

賞換花翎九年攻安嶽太湖諸賊壘克之明年助楚軍克太湖歷擢協領加副都統銜冬我軍圍安慶逆酋陳玉成擁眾自舒城廬江西上牽制我軍勢張甚多隆阿營挂車河嚴陳以待賊徑渡我軍三路迎擊戰方酣金順以騎兵出香鋪街貫賊中堅賊卻合軍逐北二十餘里賊壘悉平賊渠黃文金糾捻逆渡江規與玉成合逆擊之新安渡斬馘甚夥當是時多隆阿以荊州將軍將騎提督鮑超將步軍行輒相輔爲賊所畏號多龍鮑虎東南諸統將無與抗行而金順故多隆

阿部將冠擊賊常爲軍鋒同治元年粵捻合據河南
荆子關隨多隆阿攻克之明年多隆阿以

欽差大臣赴陝西剿逆回率所部從王閣村羌白鎮並賊老
巢至立克之尋敗賊渭河刻平南岸賊寨

實頭品頂戴進克高陵縣涇河迤北肅清乘勝破蘇家溝渭
城賊巢三年漢南賊東竄鳳翔率騎兵逆擊於澧峪
殄之幾盡全陝回務肅清方西安被圍賊眾號十萬
晝夜力攻城中危甚所在援軍莫適先發金順所將
數百騎耳出賊不意冒圍直入縱橫盪決賊遂土崩
巡撫劉蓉盛陳其功稱忠勇有謀不避艱險每戰必

先馭軍尤嚴明有法授鑲黃旗漢軍副都統尋調西
安副都統粵逆逼會城爲官軍所遏西奔督騎兵追
及灃河東岸興隆鎮大敗之而逆酋悍黨屬集盤屋
店子頭田峪口等處進軍南集賢村偪賊而壘直搗
店子頭賊三路出禦麾騎蹂之賊陳亂所殪以千計
毀其巢賊退據鹿門村各堡爲持久計旣而賊將攻
淇水二堡偵知會諸軍截擊多所斬馘明年攻甯夏
城南賊壘奪其礮臺固原賊合於逆回蔓延黃河兩
岸率軍分三路趨黃渠橋寶豐南擊之斬逆酋孫保
義等五年調甯夏副都統尋署甯夏將軍七年勦賊

定邊勝之而逆回竄據甯條梁陷懷遠犯甯榆南關
詔趣赴甯條梁秋師進榆林連戰皆捷賊走葭州遣將敗之
關山苑及張家坪明年復殺德州擊敗榆林賊尋聞
陝賊圍甯夏疾馳抵纏金會提督張曜等軍大破之
冬逆回趙五阿渾自陝來援王家疃偕張曜逆擊斬
趙五阿渾進克馬秦納洪兩寨身被數創九年逆回
馬化隆誘甯郡降回馬萬選復叛遣將擊走之尋以
新渠甯郡防軍無多陝甘各回鱗集疏請濟師

詔提督宋慶率豫軍兼程以赴夏王家疃賊自牛頭山竄河
西會諸軍敗之黃渠口斬悍酋梅照喜等明年克王

家瞳

貨穿黃馬鞋進攻通貴堡克之獲馬萬選餘賊窮蹙乞降擢
烏里雅蘇台將軍疏言未能遽之任請暫統全軍進
討甘涼鎮番諸賊

允之尋以還甯夏未報起程赴鎮番

詔褫職卽日督所部赴肅州道擊鎮番賊勝之會烏魯木齊
提督成祿行抵金塔

詔速赴肅州統其軍十二年秋與

欽差大臣陝甘總督左宗棠會師肅州攻克之

詔復原官

賞還黃馬桂花翎勇號肅州既復議出關役苦餉艱諸將多
內憚獨請行宗棠疏陳謂服其力願大局會

詔以烏魯木齊都統景廉駐古城兵力甚薄

命率所部二十營赴之規復烏魯木齊於是遂發出關數十
里卽瀚海軍忽不行問之則曰先鋒營駐有所議知
且變疾從數騎馳視有三弁迎陳所以手刃斬之營
官偕一哨官至復刃之營官書記在旁曰奈何不令
一言又刃之麾其軍曰敢留者視此於是角聲嗚嗚
軍以次行駐馬視過盡乃列六尸拜之曰雜賦豆麩
不飽佐以野蔬天下無若西軍苦此行度戈壁並乏

水草吾非不知但不忍汝六人如全軍何如

國家何又如關內生靈何遂放聲大哭聞者由是知盡
瘁事

國苦心矣道授正白旗漢軍都統明年至古城與景廉
會師因演礮兩軍外漢回觀者數百千人金順長身
赭面微鬚額甚闊而銳下材官列侍大抵及其乳聲
若洪鐘見之莫不聳異於是景廉所部指敗塔煙筒
爲的擊之再煙筒無恙所部管帶開花礮隊總兵鄧
增粵人幫帶參將張玉林江甯人拉礮進且日許大煙筒
何足擊請捲旗卓之爲的玉林測視畢請於金順又

測視畢礮響旗飛如翦霞空際既而增亦爾觀者謹
呼聲震遠近逆回聞之氣奪尋

命幫辦新疆軍務光緒元年調烏魯木齊都統先是逆酋白
彥虎糾脅賊眾竄瑪爾斯據爲老巢時窺古城勢復
熾明年進軍攻之既拔黃田賊卡長驅古牧地破其
堅壘連下烏魯木齊迪化昌吉呼圖壁各城直逼瑪
爾斯陳斬僞元帥馬興南北兩城相繼克

黃戴雙眼花翎子雲騎尉世職調伊犁將軍四年攻克西四
城回疆底定率軍收還伊犁鎮之十一年入

觀道卒

詔給銀千兩治喪靈柩回旗官爲護送

賜祭葬如典禮加太子太保銜

予諡忠介初金順婚託莫洛氏逾月屬事繼母撫諸弟遂出而轉戰數十年至新疆乃遣奉一品夫人

誥命迎之謂使者曰太夫人老矣甯能涉萬里吾義不得獨行且彼處盛姬侍能多育子姓宗祧不墜吾又何求遂不往時爭賢焉而金順故隸多隆阿其取受頗異又於幕府士不能禮下士以故多去之他軍其會攻王家驢他將幕府豫草奏以待旣克卽發金順功實最徒以入告之後

賞次他將時不以他將爲攘功謂金順失士宜爾此亦篤論
然旣開幕府又可使虛無人哉

花哩雅春吉林人其氏與所隸之旗未詳咸豐初從
征新疆以戰創回旗調理道出奉天廣甯時馬賊不
靖擾及

興京廣甯民懼將他徙謂曰無懼賊眾烏合耳吾戰天
山瀚海間嘗以百人破敵二千今從者四十人雖創
殘之餘皆經百戰矧有城可憑何懼哉由是民恃以
守賊至擊去之積前新疆功授

盛京副都統當是時賊有竄吉林者而敗或獲其礮則

興京守

陵者也署將軍德英以

聞

詔下其事奉天奉天覆言

陵礮無恙曾德英以憂去繼者亦疏言覆驗非是也

德昌其氏未詳三姓陳滿洲隸鑲紅旗趨勇善戰咸
豐八年出戍天津轉戰河南江蘇累擢防禦同治元
年師旋會朝陽賊竄黑背山所在焚掠隨副都統富
明阿攻之三家子陷陳爲軍鋒所殺過當而右膝亦
被槍傷擢佐領先是

詔吉林選騎兵百赴神機營操演德昌率之往五年奉天馬賊日熾尙書文祥奉

命討之德昌以所部從戰中陽堡朝陽坡並捷明年破賊吉林大孤山游摧副都統光緒元年駐軍昌圖偵八家子餘孽復起其巢險甚阻之以守選精騎往勦擒斬無遺

賜號博奇巴圖魯授騎都尉世職七年署伯都訥副都統旋調甯古塔副都統卒子某某襲世職兼二品廕生德玉琿春人其氏與所隸之旗未詳善火槍暇走一騎獵山中百發百中同治四年吉林所在皆賊賊窺

會城有備遂竄宵古塔通瑋春時軍興徵調四出德
玉雖以防禦留而守望不具賊至趨東門徑入舉城
沸然德玉槍而騎獨馳逆之一槍賊渠殪再槍賊執
旗之目殪賊連喪其首大懼又沸聲四起慮有伏且
自來無單騎臨戎者乃疑而遁以功擢協領是役以
一人全城在古亦罕會幾何日他事實乃一無所傳
卽此傳於誰何亦幸耳惜哉惜哉